

ТОШКЕНТ ҲАҚИКАТИ

Ҳақсевар, она юрт, мангу бўл обод!

Вилоят ижтимоий-сиёсий газетаси

TOSHKENT HAQIQATI

1928 йил 11 декабрда асос солинган • 1997 йил 10 сентябрь, чоршанба • № 72 (10.950) • Эркин нархда сотилади.



Ўзбекистон Президенти Кубоги учун

ТЕННИС БАЙРАМИ БОШЛАНДИ

МАНА, тўрт йилдирки, анъанавий бўлиб қолган Ўзбекистон Президенти Кубоги учун халқаро теннис турнири катта шодиёна ва байрам сифатида ўтмоқда. Унинг нуфузи тобора ортиб бораётганлиги қувонарлидир. Қисқа фурсатда бу мусобақанинг челенжер доирасидан жаҳон миқёсидаги энг йирик «АТР-TOUR» турнири мақомига кўтарилиши юртимизда ушбу спорт нақадар тез оммалашаётганлигидан далолатдир.

Шу кунларда теннис олами дунёда энг нуфузли ҳисобланган ва шу вақтгача атиги 34 мамлакатда ана шундай юқори мавқеда ўтказилган мусобақани катта эътибор билан кузатмоқда. «АТР-TOUR» ихрочи директори Марк Майлс Тошкент

турнири қатнашчилари ва ташкилотчиларига йўллаган табрик мактубида Ўзбекистон Президенти Кубоги мусобақаларини Тинч уммон ва Осиё минтақаси мамлакатларининг 100 миллионга яқин томошабинлари кўражагини хабар қилди. Ўтган турнир-

ларда жаҳон профессионал теннисчилар таснифи рўйхатида кучли юзликдан кейинги ўринларда турадиган спортчилар иштирок этган бўлса, бу сафарги турнирда эса россиялик Евгений Кафельников (№ 3), германиялик Тим Хинман (№ 21), швейцариялик Марк Россет (№ 27), чехиялик Богдан Юлехраж (№ 36), испаниялик Жавиер Синчез (№ 38) ва бошқа ўндан зиёд кучли юзликка кирган жаҳон теннис «юлдузлари»нинг қатнашиши муҳлисларда катта қи-

зиқиш уйғотмоқда.


Кеча пойтахтимиздаги «Юнусобод» теннис мажмуида анъанавий тўртинчи теннис турнирининг тантанали очилиш маросими бўлди. Ўзбекистон Республикаси Президенти Ислоҳ Каримов турнир қатнашчиларини қутлаб, нутқ сўзлади ва уларга улкан ютуқлар тилади.

(Президент Кубоги мусобақалари ҳақидаги мақола билан саккизинчи саҳифада танишасиз).

ТАШКИЛИЙ МАСАЛА КЎРИЛДИ

ХАЛҚ депутатлари Ангрен шаҳар Кенгашининг навбатдан ташқари сессияси бўлиб ўтди. Унда ташкилий масала кўрилди. Шаҳар ҳокими Тошпўлат Анорбоев бошқа ишга ўтганлиги муносабати билан эгаллаб турган вазифасидан озод этилди. Тошкент вилояти ҳокими муовини лавозимида ишлаб келган Ҳамидулло Асатов Ангрен шаҳар ҳокими этиб тасдиқланди.

Сессия ишида Тошкент вилояти ҳокими Эркин Рўзиев қатнашди ва сўзга чиқди.



«Пахта — 97»

— Бу йил, — дейди туман ҳокими Эшмуҳаммад Бердиев, — давлатга 18 минг 100 тонна пахта етказиб беришга аҳд қилганмиз.

Дала меҳнатқашларининг фидойилиги, маҳоратларига тан бермай иложимиз йўқ. Улар катта қийинчиликларни енгиб, режани ошириб бажариш имкониятини берадиган ҳосил етиштирдилар.

Ҳамма жамоаларда республика Вазирлар Маҳкамасининг бу йилги мавсумни ушқоқлик билан ўтказиш, йиғим-теримни қисқа муддатларда тугаллашга қаратилган қарори асосида тайёргарлик, ташкилотчилик ишлари кучайтириб юборилди.

Бу йил туман механизатор-

ЧИНОЗ «ОҚ ОЛТИН» ҚАРВОНИ

НИҲОЯТ, пахтакорлар орзиқиб кутган кунлар келди. Деҳқоннинг ҳалол меҳнати, пешона тери эвазига етиштирган «оқ олтин» тарозига туша бошлади. Айниқса, бугун чинозликларнинг кайфияти ўзгача, қувончларининг чеки йўқ. Дастлабки тонналар ортилган пахта қарвони қабул пункти томон йўл олди. «Биринчи чаноқ» байрами катта тантананага айланиб кетди.

лари ҳосилнинг кам деганда 70 фоизини териб берамиз, деярлик қилдилар. Қўл теримини кучайтириш, самарадорлигини ошириш юзасидан ҳам тадбирлар кўриб қўйилди.

Тантананада сўзга чиққан «Ўзбекистон» жамоа хўжалиги раиси Э. Жонтелеев ўз режалари, тажрибалари билан ўртоқлашди.

— Сиз бир ёндан, биз бир ёндан, деганларидек, деҳқонларга ҳар йилгидагидек, бу йил ҳам баҳоли-қудрат қарашиб юборамиз, мададкор бўламиз, — деди фахрийлар уюшмаси сардори И. Тешабоев.

Асосий мақсад етиштирилган

ҳосилни қандай бўлмасин, тез, нобуд қилмасдан йиғиб-териш олиш. Шундай бўлгач, биз халқ маорифи тизими ходимлари ҳам қараб турмаймиз. Зарур бўлганда далага чиқиб, деҳқонлар билан ёнма-ён туриб, меҳнат қиламиз. Туман халқ маорифи бўлими раҳбари Т. Эргашевнинг фикри ана шундай бўлди.

Шу кунги чинозликлар пахта тозалаш заводида 160 тонна ҳосил топширдилар.

... Долзарб дамлар бошланди. Кенг пахтазорларда ҳосил йиғим-теримига киришилди.

Т. ЭРХЎЖАЕВ.

Бу сонда

Олий қадрият
Ўзбекистон Республикаси Президентининг «Маънавият ва маърифат» жамоатчилиги фаолиятини янада такомиллаштириш ва самарадорлигини ошириш тўғрисидаги Фармони эълон қилинганлигига бир йил тўлди.

3-4-5-6-БЕТЛАР

Халқаро ҳаёт
ЎЗБЕКИСТОН ВА ЖАҲОН:
• «Центразбат — 97»
• Орол денгизи эҳтиёжларига 75 млн. доллар қарз
• Қадимий Ипак йўли тикланмоқда

7-БЕТ

Теннис:
«Юлдуз»лар Юнусободда тўпландилар
Футбол:
Бундай ҳисоб ҳаёлингизга келганмиди?

8-БЕТ

Вилоят ҳаёти

САККИЗ МИНГ КИШИГА ХИЗМАТ КЎРСАТАДИ

ҚИБРАЙ тумани Тузель қишлоғи марказида Жамбул номли янги шифокорлик маскани ишга тушди. Замонавий ускуналар билан жиҳозланган бу масканда турли хил бўлимлар мавжуд бўлиб, у саккиз минг аҳолига хизмат кўрсатади.

Янги масканнинг муддатидан илгари қурилиб, фойдаланишга топширилишида Файзулло Ҳабибуллаев бошлиқ 6-механизациялашган кўчма колонна қурувчилари фидокорлик билан меҳнат қилдилар.

Абдуҳамид ФОЗИЛОВ.

СОҒЛОМЛАШТИРИШ ИНШООТИ ҚУРИЛЯПТИ

ОЧИҚ турдаги «Оҳангароншифер» ҳиссадорлик жамияти ишчи-хизматчилари ишлаб чиқариш ҳажминини ой сайин ошириб бормоқдалар. Натижада олинаётган даромад ва фойда кўпаймоқда. Бу жамоани ижтимоий муҳофаза қилиш ишларига анчагина маблағ ажратиш имконини берапти.

Буни шифер ишлаб чиқарувчиларга хизмат кўрсатадиган муассасаларни барпо этишда ҳам яққол кўриш мумкин. 6 гектар ҳушманзара майдонни эгаллаган дам олиш минтақасида уларнинг саломатлигини мустаҳкамлаш учун барча қулай шароитлар яратиб берилган. Бу ерда яна бир соғломлаштириш иншооти қуришга киришилди. Узунлиги 70, эни 40 метрли бу сузиш ҳавзаси келгуси йилда фойдаланишга топширилади.

М. МАҲМУДОВ.

БАРҚАРОРЛИКНИНГ МУҲИМ ОМИЛИ

Бекободда, «Ўзметкомбинат» акционерлик ишлаб чиқариш бирлашмасида қора ва рангли металл парчаларини тайёрлаш ва қайта ишлаш учун топшириш масалаларини назорат қилиш ва мувофиқлаштириш бўйича республика комиссиясининг мажлиси бўлди. Мажлисни шу комиссиянинг раиси, республика Бош вазирининг биринчи ўринбосари И. Жўрабеков бошқарди.

Мажлисда Қорақалпоғистон Вазирлар Кенгаши Раисининг, Тошкент шаҳри ва вилоятлар ҳокимларининг ўринбосарлари, вазирликлар, идоралар, иккиламчи металл хомашё тайёрлаш билан шуғулланувчи бошқа

ташкilotлар раҳбарлари иштирок этди.

Комиссия йил бошидан буён қилинган ишларнинг якунларини кўриб чиқди. Шу даврда белгиланган миқдорда қора металл парчалари тайёрланди, рангли металл парчаларини тайёрлашда бироз қоқликка йўл қўйилди.

Республика бўйича металл парчалари тайёрлаш ва топшириш ишларининг натижалари умуман қониқарли, лекин бир қанча вилоятларда режалаштирилган кўрсаткичларга эришилмади. Хусусан, Қорақалпоғистонда, Навоий, Сирдарё ва бошқа айрим вилоятларда шундай бўлди. Кўпгина вазирликлар ва идоралар, айниқса «Ўзсувқурилиш», «Ўзсаноатхўжалиққури-

лиш» ҳамда бошқа ташкilotлар бу ишда қоқликка йўл қўйди. Ҳолбуки, металл парчаларини топширувчи барча ташкilotлар каби булар ҳам металл парчаларини тайёрлаш ва шу ҳисобдан ишлаб чиқариш учун зарур буюмларни олишдан бевосита манфаатдордир. Бундан ташқари металл парчалари тайёрлаш ва топширишни рағбатлантириш тартиби амал қилмоқда, бу тартибга кўра, иккиламчи хомашё ўз вақтида топширилиши, сифати ва миқдори ҳам ҳисобга олинади.

Таҳлилнинг кўрсатишича, иккиламчи металл хомашё йилнинг ҳар чораги давомида бир маромда топширилмаяпти, оқибатда «иккиламчи қора металл» тайёрлаш

пунктларида иш ҳажми ўзгариб, хомашёни ҳисобга олиш қийинлашмоқда. Рангли металллар парчаларини тўплаш, сақлаш ва улардан фойдаланиш чоғида бузилишларга ҳам йўл қўйилмоқда.

Ҳозирги вақтда Ўзбекистон халқ хўжалиги тармоқлари учун тайёр металл буюмларнинг кўпчилик турлари билан ўзини мустақил таъминлашга қодир эканлиги мажлисда айтиб ўтилди. Бу эса бундай маҳсулотларни республикадан ташқаридан сотиб олиш учун илгари сарфланган катта маблағни тежаш имконини бермоқда.

«Ўзметкомбинат» акционерлик ишлаб чиқариш бирлашмаси металл прокатнинг янги турларини ишлаб чиқаришни мунтазам ўзлаштирмоқда, масалан, кон-руда саноати учун турли диаметрдаги тош майдалайдиган шарлар ишлаб чиқариш ўзлаштирилди, тез ривожланаётган қурилиш маҳсули учун ишлаб чиқарилаётган буюмларнинг турлари

кўлаймоқда. Ҳозир корхонада ишлаб чиқариш кенг кўламда қайта қурилмоқда, натижада тез орада комбинатнинг барча имкониятларини рўйбга чиқариш, маҳсулот сифатини яхшилаш мумкин бўлади. Лекин бунинг учун хомашё заҳираларини тўлдириш талаб қилинади.

Комиссия мавжуд камчиликларни бартараф этиш, тайёрлаш ва транспорт ташкilotлари металл парчаларини бир маромда етказиб бериши учун зарур шарт-шароитни таъминлаш, иккиламчи хом ашёни топшириш мажбуриятлари сўзсиз бажарилиши учун чора-тадбирлар кўриш юзасидан аниқ топшириқлар берди. Бу иш учун масъулият ҳокимликлар, вазирликлар ва идораларнинг биринчи раҳбарлари зиммасига юклатилди.

Комиссия мажлисида Тошкент вилояти ҳокими Э. Рўзиев иштирок этди. (ЎЗА).

КЎРГАЗМАДА ҚУДРАТЛИ «КЕЙС»ЛАР

«ЎЗЭКСПОМАРКАЗ» республика савдо-саноат кўرғазмасининг 4-павильонига «КЕЙС» мультимимий корпорациясининг Ўзбекистон Ва Ўрта Осиёгаги биринчи кўрғазмаси иш бошлади

КЎРГАЗМА 8 сентябрь куни тантанали равишда очилди. Минглаб томошабинлар қудратли «Кейс»ларни завқ билан томоша қилдилар. Корпорация томонидан ишлаб чиқарилаётган кўплаб қишлоқ хўжалик ва қурилиш техникаларининг салобати одамларни ўзига жалб этмай иложи йўқ эди.

Ўзбекистонда биз қатор қўшма корхоналар ташкил этдик. Жумладан, «Ташсельмаш» заводи билан ҳамкорликда пахта териш машиналари ишлаб чиқаришимизга кенг имкониятлар

байнида «Кейс»нинг юздан зиёд мутахассислари қишлоқ хўжалик ускуналаридан фойдаланиш ва унга хизмат кўрсатиш бўйича техник ёрдам кўрсатдилар. Шулардан 40 таси ўз-

либ, 1997 йилнинг охиригача 50 та пахта териш комбайнини тайёрлаб беради. Улар, аввало, Ўзбекистонга, қолаверса қўшни мамлакатларга сотилади.

«Кейс» корпорациясининг 1996 йилги йиллик савдо ҳажми 5,4 миллиард долларни ташкил этди. Корпорацияда тахминан 4900 та мустақил дилерлар ва дистрибьютерлар хизмат қилишади. Шу йилнинг иккинчи чорагида «Кейс» корпорациясининг соф фойдаси 25 фоизга ўсиб, ўтган йилнинг шу даврига нисбатан анча кўп 138 миллион АҚШ долларини ташкил этган. Ҳар бир акциядан олинган соф даромад 1,82 АҚШ долларига тенг бўлмоқда.

Учрашувда журналистлар ўзларини қизиқтирган қатор саволлар билан корпорация вакилларига мурожаат қилишди.

Мустақил юртимизга жаҳонда тан олинган, ҳар томонлама қулай ва фойдали бўлган техникалар жуда-жуда зарур. Яхши техника мўл ҳосил гарови. Шундан бўлса керак, кўрғазмани томоша қилаётган юзлаб қишлоқ хўжалиги ходимлари қудратли машиналардан кўз узмай, мутахассисларни саволларга тутдилар. Тўғри-да, ҳадемай ўзлари мана шу техника билан тиллашадилар.

Кўрғазма 10 сентябргача давом этади.

Миржалол МИРАЛИЕВ,
«Тошкент
ҳақиқати»нинг
маҳсус мухбири.

СУРАТДА: Кўрғазмага қўйилган «Кейс» маҳсулотлари.
Р.НУРИТДИНОВ (ЎЗА)
олган сурат.



Зеро, бир неча йилдан бери Американинг «Кейс» корпорацияси маҳсулотлари республикамиз ва вилоятимиз далаларида зўр унум билан ишлаётгани ҳаммага маълум. Улкан ғаллазорларда ишлаган бу самарали техника ўзининг ҳар томонлама қулай ва замонавий эканлигини исботлади. Ҳадемай, вилоятимиз пахта дадаларида «Кейс»ларнинг пахта териш комбайнлари иш бошлади.


Кўрғазма очилгандан сўнг оммавий ахборот воситалари вакиллари учун матбуот конференцияси бўлиб ўтди. Учрашувда сўзга чиққан «Кейс» корпорациясининг Оврупо, Африка ва Яқин Шарқдаги ишлар бошқарувчиси ва президенти Леопольд Платтнер корпорация ҳақида сўзлаб берди.

— «Кейс» компанияси 150 йил муқаддам ташкил топган. Бугунги кунда ўз маҳсулотларини жаҳоннинг турли мамлакатларига сотмоқда. Эндиликда Ўзбекистонда ҳам ўз корхонамиз бор, — деди жумладан жаноб Платтнер. — Ўзбекистон ҳам Шимолий Америкадаги каби қишлоқ хўжа-

лигига ихтисослашган мамлакатдир. Биз бу ерда иш бошлар эканмиз, республикага кўплаб қишлоқ хўжалик машиналари етказиб берамиз. Корпорация ишлаб чиқарадиган маҳсулотларининг ярмини қишлоқ хўжалик техникаси, 30 фоизини эса қурилиш техникаси ва қолган қисмини эҳтиёт қисмлар ташкил этади.

яратилди. Хусусан, бир неча қўшма лойиҳалар устида жиддий изланиш олиб бормоқдамиз. Бундан ташқари «Кейс» ўзининг янги «ЎзКейсСервис» қўшма корхонасини ташкил этишни ҳам кўзлаб турипти. Бу лойиҳа амалга ошса, республикада барча қишлоқ хўжалик машиналари ва ускуналарига техник хизмат кўрсатадиган 14 та марказ тузилади. 1997 йил мо-

бек механизаторларидир. Улар «Кейс» ва «Агротех», ускуналар етказиб бериш бўйича «Кейс»нинг савдо вакиллиги томонидан танлаб олинган ва ушбу мақсад учун ўқитилган. Ўтган йилнинг ноябрь ойида ташкил этилган «ЎзКейсМаш» қўшма корхонаси ишлаб чиқариш қувватларини ошира бориб, маҳсулот бера бошлади. Бу корхона Тошкентда жойлашган бў-




ОЛИЙ ҚАДРИЯТ

Ватан, қучогида балқди тафаккур,
Элни, дилни поклагай шу муқаддас нур.

«Маънавият ва маърифат» жамоатчилик маркази вилоят бўлими ва «Тошкент ҳақиқати»нинг махсус сони

Ўзбекистон Республикаси Президентининг «Маънавият ва маърифат» жамоатчилик маркази фаолиятини янада такомиллаштириш ва самарадорлигини ошириш тўғрисида»ги Фармони эълон қилинганлигига бир йил тўлди.



МАЪНАВИЯТИ

БОЙ

ХАЛҚМИЗ

ЎЗБЕКИСТОН Республикаси Президентининг «Маънавият ва маърифат» жамоатчилик маркази фаолиятини янада такомиллаштириш ва самарадорлигини ошириш тўғрисида»ги Фармони эълон қилинганлигига бир йил тўлди. Утган вақт ичида республикамиздаги каби вилоятимизда ҳам бу борада анчагина самарали ишлар амалга оширилди. Мазкур марказнинг вилоят ва туман бўлимлари жойларда Президент фармонлари, ҳукумат қарорлари моҳиятини, истиқлолимиз берган самараларни мунтазам тарғиб этмоқдалар. Ижтимоий-иқтисодий ислохотларнинг изчил рўйбга чиқишига кўмаклашмоқдалар. Сўхбатлар чоғида аждодларимиз маданий-маънавий меросини авайлаб-асрашга, қадриятларимизни ардоқлаш, бугунги кунда эришилган бекиёс ютуқларга ҳурмат муносабатида бўлиш, кишиларда она-Ватанга садоқат туйғусини шакллантиришга жиддий эътибор берилмоқда.

ХИЗМАТ тақозоси билан тез-тез вилоятимизнинг шаҳар ва туманларида, қишлоқ ва кўрғонларида бўлиб, турли тадбирлар ташкил этишга тўғри келади. Улуғ айём арафасида биз ўтказган сўхбатлар, маърузалар, анжуманларнинг мазмуни ва моҳияти бир мавзуга қаратилди. Бу истиқол мавзуи, мустақиллик неъматлари эди.

Шундай бўлиши табиийдир. Жойларда республикамиз мустақиллигининг олти йиллиги кўта-

ринки кайфият билан, меҳнат ютуқлари билан кўтиб олинди. Утган олти йил мобайнида кўлга киритилган натижалар сарҳисоб қилинди. Йил сайин мустақиллигимиз мустаҳкамланиб, унинг неъматлари яққол кўзга ташланиб турипти. Бунга кўплаб мисоллар келтириш мумкин.

Шу ўринда бир савол туғилади: одамлар ички дунёсида, қалбида кечаётган ўзгаришлар қандай? Дарвоқе, уни қайси ўлчовда ўлчаш, қайси йўл билан қиёслаш мумкин? Республикаимиз Президенти Ис-

лом Каримов ўтган йили 4 сентябрь кунини республика Маънавият ва маърифат жамоатчилик маркази раҳбарияти, бошқаруви аъзолари билан бўлиб ўтган учрашувда бу саволга аниқ жавоб бердилар. Бу мезон инсон кайфиятининг соғлиғи, ўзини чуқур англаш, мустақиллик қадрини тобора теран тушуниши, миллий тафаккурнинг кенгайиши каби жўн, айни вақтда, ўта мураккаб омиллар билан белгиланади.

Жамиятда юксак маънавий қадриятларни камол топтиришдек муқаддас ишга камарбаста бўлиш ниятида ташкил этилган республика «Маънавият ва маърифат» жамоатчилик маркази ва унинг Тошкент вилояти бўлими айнан мана шу мезон талаблари асосида иш юритмоқда. Жойларда одамлар билан фикр алмашиш жараёнида миллий мафқуранинг шаклланиб, такомиллашиб бораётганлигига тўла ишонч ҳосил қилмоқдамиз. Мазкур мулоқотлардан келиб чиқиб, бўлажак учрашув ва сўхбатлар мавзуини аниқламоқдамиз.

Биз кейинги пайтларда ёшлар онгида миллий гуруҳ туйғусини янада такомиллаштириш билан изчил шуғулланяпмиз. Юракда Ватан деган туйғу, ўзлик деган ҳикмат бўлади. Бу туйғунинг, бу ҳикматнинг сарчашмаси она-заминга бўлган

муҳаббатдир. Бу туйғу, бу ҳикмат инсоннинг киндик қони тўқилган тупроқдан бошланади. Шундай экан, ҳар биримиз, энг аввало, ўзимиз туғилиб ўсган маҳалладан, қишлоқдан фахрлана билишимиз керак. Ундаги энг яхши анъаналарни, қадриятларни кўз-кўз қилиб, қалбимизда ифтихор туйғусини туйишимиз лозим. Зеро, Ватан биз туғилган маҳалладан, қишлоқдан бошланади.

Ватанга муҳаббат, ўзликка ҳурмат келажаги буюк мамлакатимизнинг миллий рамзларига садоқатдан камол топади.

Бу — Ўзбекистон Давлат байроғи.

Бу — Ўзбекистон Давлат мадҳияси.

Бу — Ўзбекистон Давлат герби.

Бу — Ўзбекистон Конституцияси.

Уларнинг ҳар бирига жо этилган муқаддас туйғулар қалбимиздаги миллий гуруҳ билан ҳамоҳанг бўлиб кетмоғи лозим. Шундагина бизга ўзликимизга қайтганлигимиз, маънавиятимиз булоқлари қайтадан кўз очганлиги яққол намоён бўлади.

Эндиликда дадиллик билан айтиш мумкинки, ёшларимиз қалбига ватанярварлик туйғулари тобора чуқурроқ сингиб борапти. Буни биз яқинда Янгийўл туманидаги «Тинчлик» жамоа хўжалигида ташкил этилган «Қадри баланд, қадди баланд, Ватаним» деб номланган адабий-бадий анжуман жараёнида ҳам, Оҳангарон ва Ангрэн шаҳарлари ёшлари билан ўтказилган учрашув давомида ҳам яққол ҳис этдик. Энг муҳими мана шундай учрашув ва мулоқотлардан сўнг одам

(Давоми 4-бетда).

МАРКАЗДА КАТТА МАЪРАКА


РЕСПУБЛИКА «Маънавият ва маърифат» жамоатчилик маркази биносида Ўзбекистон Республикаси Президентининг «Маънавият ва маърифат» жамоатчилик маркази фаолиятини такомиллаштириш ва самарадорлигини ошириш тўғрисида»ги Фармони эълон қилинганлигига бир йил тўлиши муносабати билан бўлиб ўтган илмий-амалий конференцияда шу соҳанинг барча вилоятлардаги ташкилотлари раҳбарлари, олимлар, оммавий ахборот воситалари ходимлари иштирок этдилар. Анжуманда мазкур марказ раҳбари Н. Аминов бир йил ичида амалга оширилган ишлар юзасидан маъруза қилди.

Шунингдек, конференция қатнашчилари қатор олимларнинг Президентимизнинг «Ўзбекистон XXI аср бўсағасида: хавфсизликка таҳдид, барқарорлик шартлари ва таракқиёт кафолатлари» китобининг маънавиятни бойитишдаги аҳамияти, ҳуқуқий маданиятни шакллантириш, миллий-маънавий назарияси, қадимий ёзма маънавий қадриятларимиз, мактабда маънавият сабоқлари ва бошқа қатор мавзулардаги маърузаларини тингладилар.

Анжуманда Ўзбекистон Республикаси Президентининг Давлат маслаҳатчиси Ўткир Раҳматов нутқ сўзлади.



● ЖАМИЯТДА ЮКСАК МАЪНАВИЙ ФАЗИЛАТЛАРНИ КАМОЛ ТОПТИРИШ, МИЛЛИЙ МАФКУРАНИ ШАКЛЛАНТИРИШ, ЁШЛАРНИ ИСТИҚЛОЛ ҒОЯЛАРИГА САДОҚАТ РУХИДА ТАРБИЯЛАШ МАМЛАКАТИМИЗДА АМАЛГА ОШИРИЛАЁТГАН БАРЧА ИСЛОҲОТЛАРНИНГ ҲАЛ ҚИЛУВЧИ ОМИЛИ ҲИСОБЛАНАДИ.



(Давоми. Боши 3-бетда). руҳан энгил тортади, мамлакатимиз келажагининг буюклигига яна бир қарра иймон келтиради. Мустақилликнинг олти

йиллиги арафасида бу каби анжуманлар вилоятимизнинг барча шахар ва туманларида тез-тез ташкил этилди. Бугун биз маънавий-маърифий ишлар марказини айнан қишлоқ жойларга кучирмоқдамиз. Шу муносабат билан шахар ва туманлардаги бўлимларимизнинг фаолиятини

яхшилашга алоҳида эътибор беришимиз. Улар халқ орасига дадил кириб боришгапти. Ангрен, Чирчик, Оҳангарон шахарларида, Юқоричирчик, Уртачирчик, Паркент туманларида амалга оширилган ишлар, айниқса, диққатга сазовордир. Албатта, қилинган ишларни, таъбир жоиз бўлса, хамир учидан патир, дейиш мумкин. Миллий мафкурани шакллантириш, ёшларни бой маданий меросимиз, тарихий аънаналаримизга, умуминсоний қадриятларга, Ватанга муҳаббат, истиқлол ғояларига садоқат руҳида тарбиялаш борасида ҳам олдимизда кенг қўламли ишлар турипти. Шундай экан, биз жуда кўп

ташкilotлар, жамғармалар билан қўлни-қўлга бериб, биргаликда фаолият курсатишимиз лозим. Куч бирликдадир. Маънавий, маърифий ва тарбиявий ишлар ўзаро ҳамкорликда ва самарали олиб борилгандагина биз пировард мақсадга эриша оламиз. Шунда вилоятимизнинг ҳар бир фуқароси ўз ўрнини мамлакатимизда олиб борилаётган ислоҳотларнинг олдинги сафларидан топади. **Раҳматилла ШЕРАЛИЕВ, республика «Маънавият ва маърифат» жамоатчилик маркази Тошкент вилояти бўлими раҳбари.**

ОЛИМЛАР СУҲБАТИ

ЮҚОРИЧИРЧИҚ туманидаги «Туркистон» жамоа хўжалигида вилоят ва туман «Маънавият ва маърифат» марказларининг биргаликда ташкил этган «Давлат, оила, жамият ва ёшлар тарбияси» мавзусидаги давра суҳбати бўлиб ўтди.

Унда Тошкент Давлат юридик институти доценти, тарих фанлари номзоди М. Мирзаев, Тошкент Медицина-педиатрия институти доценти Т. Норбоев ва бошқалар Президентимизнинг «Ўзбекистон XXI аср бўсағасида: хавфсизликка таҳдид, барқарорлик шартлари ва тараққиёт кафолатлари» китобининг ахамияти, Афғонистон, Тожикистондаги қонли урушлар оқибатлари, ёшлар тарбияси, ичкиликбозлик, жиноятчиликларнинг олдини олиш, исломий қадриятларимизнинг ахамияти, ҳуқуқий маданият, оилада қизларни турмушга тайёрлаш мавзуларида фикр юритдилар.

Мирза МУРОДОВ.



ШАҲРИБОНУ Мамадалиева Окқўрган тумани «Маънавият ва маърифат» жамоатчилик марказининг раҳбари ҳисобланади. У туманда ташкил этиладиган тадбирларга санъаткорларни бот-бот таклиф этади. Зеро, санъат маънавиятимизнинг бир бўлаги сифатида турмушимизни гўзаллаштиради.

СУРАТДА: Ш. Мамадалиева (ўнгдан биринчи) Ўзбекистон халқ ҳофизи Фаттоҳон Мамадалиев ҳамда марказ ходимлари Санобар Ҳайдарова ва Сайёра Рискуловалар ўзаро мулоқотда.

Даврон АҲМАД олган сурат.

تەنتەنە
ҲАҚИҚАТГА

- ◆ — БОЙЛАРНИНГ уйларига камроқ киришлар, акс ҳолда Тангрининг сизларга берган неъматларини писанд қилмаган бўласизлар.
- ◆ — ИНСОН хатони кўпроқ ўз тили билан содир қилади.
- ◆ — ТАНГРИ сизларнинг ташқи кўришларингиз ёки молу дунёларингизга эмас, балки, дилларингизга ва ишларингизга қараб, баҳо беради.
- ◆ — ЎЛИМ дахшатли ҳодисадир. Қачонки тобутни кўрсаларингиз дарҳол (ҳурмат юзасидан) ўринларингиздан туришлар.
- ◆ — АЁЛЛАРГА эркаклар ўз туғишган опа-сингиллари каби муносабатда бўлишлари керак.
- ◆ — ОРАЛАРИНГИЗДА энг кучлиларнинг кимлигини айти тайми? У ғазаб келганда ўзини тутитиб тура оладиганингиздир.

ДЕНГИЗГА ТЕНГ

Итоат эт! Агар сендан Ватан рози эмас бўлса, Ерил, чакмоққа айлан сен, Ерил, майли, тамом ўлсам. (1933 йил) БИЗ келтирган сатрлар 1937 йилги қатлиомда сталинчи қотиллар томонидан узоқ шимолда — Магадандаги сиёсий маҳбуслар хибсхоналарида қатл этилган ўзбек шоири — Усмон Носирнинг фожиами ҳалокати арафаларида ёзган ҳаётбахш шеърларидан бирига мансубдир...

30-йиллардаги ўзбек шоирлари орасида энг кам яшаган, энг ёш ва ўта қобилиятли Усмон Носирнинг бутун қалби — ҳаётга умид, келажакка ишонч, ватан ва халқ манфаатлари учун ҳалол хизмат қилиш туйғуси билан хўш урган. Унинг буюк мақсадлари, ғояси билан қайнаб тошган шеърини ирмоқлари маънавий олами, фалсафий хулосалари, эстетик завқи, маърифий юксаклигига кўра денгизга тенг келарди...

Иборамизда бир қадар муболага қабилидаги оҳанг бордай туйилиши мумкин. Аммо ҳали чинакам бадийий шеърини ёки насрий асарлар даражасига етмаган айрим адабий маҳсулотлар ҳақида аллақандай «мақтаб яратди» сингари фикрларни ўйламай-нетмай ишлатишлар қулочқа чалинганда — Усмон Носирлар, А. Қодирийлар, Чўлпонлар, Фитратлар, Элбеклар асарларидаги маҳорат ёдга келади, ҳаёлан қиёслайсиз, улардаги ҳаётнинг фалсафий таҳлили, ифодаси, шеърини ёки насрий тасвирлардаги бадиият-гўзаллик нима учун қарийб бир асрлардан кейин ҳам

қалбимизни ларзага солиб келаяти, замонлар ўтиши билан янгидан янги маънолар, ахамиятлар касб этаётгани ҳар бир онгли китобхонни ўйлатмай қўймайди.

Усмон Носир 1935-йиллардаги қайфияти, қалбини ўртаб турган яшаш иштиёқи, ватанига, халқига чексиз садоқатию, муҳаббати билан бирга вужудида жўш ураётган зиддиятларни шундай сатрларда моҳирона ифодалайди:

Дўстларим, хабар олинг. Кўнглим куяди: Бир тараф — ёшлигимнинг шўхлиги мағрур, Бир тараф — тажрибамнинг дарслари турур, Икки ёқ сўғишгади, уриш қилади. Кўнглим ёнади. Қийин. Қоним кўзгалур... Узим ўзимга тинчлик берай деб агар, — «Бу кураш, оғир кураш, биттаси энгар...» Десам қўйсам... Охирда менга не қолур? (1935 й.).

Модомики, биз Усмон Носир ва унинг замондошлари, ҳамфиқрлари, устозлари-ю, сафдошлари маънавий мероси ҳақида истиқлолимизга олти йил тўлган кезларда мулоҳаза юритар эканмиз, бу муқаддас хазинанинг бугунги ўрни нимадан иборатлигини, келажакдаги ахамияти-ю, уларнинг ҳам ўзимиз учун, ҳам бутун инсоният учун қандай маънавий ва маърифий ахамияти борлигини, келажакдаги таъкидлаб ўтишимиз жоиздир.

Гап шундаки, юқорида келтирилган шеърини сатрлардан тортиб, насрий фикрларнинг ҳаммасида — аввало ўзбек халқининг кулликдан, қарамликдан қутилиш учун курашга даъват оҳанглари янграб туради. Зеро куллик ва қарамликдан озод бўлиш ҳеч қайси тарихда ҳеч қачон бирон миллат ёки элатининггина орзуси бўлиб қолган эмас, бу бутун инсоният тарихида барча онгли инсонларнинг азалий ва абадий орзуси бўлиб қолган.

Агар шу мулоҳазалар нуқтаи назардан Усмон Носир ижоди-га ёнлашсак, ажойиб шеърини манзараларга, маънавий жўшқинликка, маърифий ҳудудларга дуч келамиз, яъни фикр эркинлиги, ватани ва халқига бегараз хизмат этиш, унинг маданий, маънавий тараққиёти учун айни энг қалтис, худди ана шу мустақил ривожланишнинг олдини олишга бутун босқинчилик сиёсати билан кураш олиб борган шўролар ва уларнинг етакчилари бўлмиш қотиллар — мустақиллаштирилган авжига чиқаяти кезларда яшаб ижод

қилган буюк ажодларимиз қаторидан Усмон Носир ҳам ўз мўътабар ўрнини энди олиб турибди. Аслида-ку, унинг ижоди халқимиз қалбида 30-йиллардан буён ҳурмат-иззат билан яшаб келди, бундан кейин ҳам яшайди. Унинг ижоди фақат расмий равишда истиқлолимиз туйғуларида ўз ўрнини топди. Номига кўчалар қўйилди. Эндилкида Усмон Носир деган ном мағрур жаранглаб турибди.

Россияда ва бошқа баъзи ҳудудларда сталинчи қотиллар даврини тиклашга уриниб, турли баҳоналар билан Марказий Осиё халқларини бир-бирига гиж-гижлатишдан ҳамон уялмаётганлар, яна игво ва фитна йўлини тутаётганлар бор. Айни кунларда Усмон Носир ва унинг буюк сафдошлари маънавий меросининг тарбиявий ахамияти ҳақида кўпроқ гапириш, тез-тез эслаб туриш жуда катта таълимий ахамият касб этади. Мана бу сатрларга эътибор беринг:

Ёшлигимнинг саргузашти бениҳоят, Бисоти ҳасодифга тўлиб битган... Кейин билсам, тасодифлар зарур экан, Ҳодисани етакларкан сабабият. (1934 й.) Мазкур фалсафий шеърининг моҳияти — ҳаётдаги ҳар бир воқеа-ҳодиса, ҳеч қачон сабабсиз рўй бермайди. Фақат сирдан «тасодифдай» туюлади-ю, негизда чуқур



Ўзбекистон ва жаҳон ИСТИҚБОЛДАГИ ТИНЧЛИКНИ КЎЗЛАБ

• «ТОШКЕНТ ҳақиқати»нинг ўтган шанба сонидеда хабар қилганимиздек, 15-21 сентябрь кунлари Марказий Осиёда саккиз мамлакат вакиллари иштирок этадиган ҳарбий машқлар бўлиб ўтади. Унда Қозғистон, Ўзбекистон, Қирғизистон, Грузия, Латвия, Россия, Туркия ҳамда АҚШ аскарлари ва зобитлари қатнашадилар. Мазкур машқнинг асосий мақсади маълум бир минтақада тинчликни сақлаш ҳамда инсонийлик ёрдамлари кўрсатиш жараёнларини такомиллаштиришдир.

Харбий машқлар «Центразбат-97» деган шартли ном остида ўтказилади. Унда 1400 га яқин аскар ва зобитлар аниқ бир вазиятларда бир-бирлари билан муносабатда бўлиш кўникмаларини меъёрига етказадилар. Машқлар НАТОнинг «Тинчлик йўлидаги ҳамкорлик» дастури мазмуни доирасига киради.

АҚШ денгиз пиёдалари корпуси бригада генерали Мартин Брендтнинг айтишига қараганда, ушбу машқларда қатнашувчилар, аввало, АҚШнинг Шимолий Каролина штатидаги Форт-Брэгг ҳарбий полигонига тўпланадилар ва бўлажак жараёнларнинг тахминий ҳолатларини қиёмига етказадилар. Сўнгра машқнинг биринчи босқичи бошланади. Марказий Осиё баътаъони таркибига кирган ҳарбийлар «Си-17» транспорт тайёраларида Қозғистоннинг Чимкент шаҳри яқинида десант сифатида ташланадилар. Бу 13 минг километрлик масофа тарихда илк бор амалга оширилаётган тажрибадир.

ОРО КИРИЛАДИ ОРОЛ «ЖОНИГА»

ЎТТИЗ беш йил муқаддам Ўзбекистон ҳудудида жойлашган Орол денгизи ўзининг сув сигими ҳажми жиҳатидан дунёда тўртинчи ўринда турар эди. Унинг балиқ хўжалигида 60 мингга яқин киши ишлар эди. Асримизнинг 60-йилларига келиб, собиқ қизил империя даврида пахта якка ҳокимлиги ўзининг энг юқори чўққисига чиқди. Уша пайтда Оролнинг асосий қон томирлари бўлган Амударё ва Сирдарё сувлари ўзбекистонларча фойдаланиш оқибатида жуда ҳам озайиб кетди. Орол денгизи ҳажман 70 фоизга, ҳудудан 50 фоизга кичиклашди.

Натижада ичимлик сувларининг сифати, мазкур минтақада яшовчи аҳолининг турмуш шароитлари анча ёмонлашди. 2,2 миллиондан иборат маҳаллий аҳолига зудлик билан ёрдам бериш керак эди. Бу ишга собиқ совет иттифоқи нураганидан кейингина чинаямига киришилди. Ўзбекистон, Қирғизистон, Туркменистон, Қозғистон, Тожикистон республикалари биргаликда қийин вазиятдан чиқиш чораларини изладилар. Бундай хайрли ишларга Жаҳон Банки ҳамда БМТнинг тегишли тизимлари ҳам бош қўйдилар. Оролга ёрдам

бериш бўйича бир неча дастурлар ва лойиҳалар ишлаб чиқилди. Яқинда Жаҳон Банки Ўзбекистонга Орол денгизи эҳтиёжлари учун 75 миллион доллар қарз бериш тўғрисида қарор қабул қилганлиги маълум бўлди. Мазкур лойиҳа минтақадаги 1,6 миллион аҳолини сифатли ичимлик суви билан таъминлаш имконини беради. Ундан ташқари, 25 минг киши яшайдиган ҳудудларда канализациялар иши яхшиланади, жумладан, 7500 та такомиллашган, замонавий ҳолатда жихозлари ўрнатилади.

Жаҳон Банкининг ҳозирги қарзи илгари тасдиқланган 117 миллион долларлик муҳандислик лойиҳасининг 82 фоизини қоплайди. Ўзбекистон бунга 12,7 миллион доллари билан ҳисса қўшади. Ундан ташқари Жаҳон Банки янги бошқа ҳомийлар ҳам топди. Масалан, Қувейт жамғармаси 19,8 миллион, Олмониянинг «Кредитанштальт фюр Видерауфбау» банки 9,4 миллион доллар ажратади.

«ТОЛИБОН» МАДАД ИЗЛАМОҚДА

Яқинда Саудия Арабистони кироли Фахд ибн Абдал Азиз ўзининг Жидда шаҳридаги қароргоҳларидан бирида Афғонистон «Толибон»лар ҳаракатининг раҳбари, муваққат бошқарув кенгаши раиси — мулло Муҳаммад Раббонийни қабул қилди. Саудия Арабистони шу йил май ойининг охирида «толибон»чиларни қонуний ҳукумат сифатида тан олган эди. Эндиликда уларга қарши курашаётган иттифоқдош кучларнинг қўли баланд бўлиб турган бир пайтда толибончилар мадад излаб турли йўналишларда ҳаракат қила бошладилар. Пул керак, сиёсий ва ҳарбий мадад керак... М. Раббоний қанақа ваъда олди экан? Ҳозирча, араб олами матбуоти лом-мим демас.

ЙЎЛЛАР ҲАМКОРЛИККА ЧОРЛАЙДИ

Ўзбекистон мустақилликка эришгандан буён, унинг жаҳон ҳамжамиятига интеграциялашуви тобора жадаллашиб бораёттир. Хусусан, Европа иттифоқи томонидан тузилган «Тасис» дастури лойиҳаларининг кўпчилиги мамлакатимизда муваффақият билан амалга оширилмоқда.

«Ўзбекистон темир йўллари» давлат акционерлик компаниясида «Тасис» таркибига кирувчи «Трасека» лойиҳаси доирасида «Марказий Осиё республикалари билан Хитой ўртасидаги транспорт йўналишларини такомиллаштириш тадқиқотлари» мавзуда биринчи мувофиқлаштирувчи халқаро конференция бўлиб ўтди. Унда Ўзбекистон ва Қирғизистон мутахассислари билан бир қаторда БМТ, Осиё банки, йирик чет эл компаниялари вакиллари иштирок этди.

Конференцияни «Трасека»нинг Марказий Осиё бўйича мувофиқлаштирувчиси М. Симс бошқарди. Унда «Трасека» лойиҳасини амалга ошириш ва бу борада бажарилиши лозим бўлган масалалар юзасидан фикр алмашилди.

Конференцияда иштирок этган қирғизистонлик вакиллари ҳам ушбу лойиҳа юзасидан ўз фикр-мулоҳазаларини билдирди. Анжуман иштирокчилари «Трасека»нинг амалга ошиши мамлакатлар ўртасидаги ҳар томонлама манфаатли ҳамкорлик алоқалари, хусусан, савдо-иқтисодий, маданий-маърифий соҳалардаги алоқаларнинг ривожланиши, қадимги «Буюк илак йўли»ни қайта тиклаш йўлидаги муҳим қадам эканини таъкидладилар.

(ЖАҲОН ОММАВИЙ АҲБОРОТ ВОСИТАЛАРИ ХАБАРЛАРИ АССОЦИАЦИЯСИ ТАЙЁРЛАДИ)

Божхона бекати ОМАДИ ЧОПМАГАН «ТАДБИРКОР»ЛАР

ЮРТИМИЗ бойлиги, халқимиз ризқ-насибасига ўғай кўз билан қараб, уни шахсий манфаатлари йўлида ҳавога совурётган айрим «тадбиркор»лар ўз қилмишлари нотўғри эканлигини боши тошга теккандагина билмашади.

Шу йилнинг 15 август куни Тошкент вилояти божхона бошқармасининг 16-сонли «Тинчлик» божхона пости ходимлари томонидан Бўстонлиқ тумани Озодбош қишлоғи орқали Чимкент вилояти Қозғистон туманига оғирлиги 24,3 тонна, умумий нархи 129 минг сўмлик селитра билан кетаётган Бўстонлиқ тумани 125-сонли автокорхонасига қарашли 5 та ЗИЛ-130 русумли автомашина тўхтатилди. Юк эгаси — «Қўшқўрғон» жамоа хўжалигида экспедитор бўлиб ишловчи, 1953 йилда туғилган Тоир Илҳомовдан ҳужжатлар сўралганда талабга жавоб бераётган нақднинг бошқа ҳеч қандай ҳужжатлар йўқлиги аниқланди. Ҳозирги кунда ушбу иш юзасидан Ўзбекистон Республикаси Жиноят Кодексининг 182-моддаси 1-қисми «А» банди билан жиноий иш қўзғатилган.

Шунингдек, 13 август куни Тошкент вилояти божхона бошқармасининг 14-сонли «Ғишт-қўприк» маскани ходимлари томонидан хайдовчи Абдусаммад Раҳимов бошқарувидаги Тошкент шаҳар ғишт-сут комбинати қарашли «КаМАЗ» русумли юк автомашинаси ҳам божхона кўригидан ўтказилганда, Қозғистон ҳудудидан ҳеч қандай ҳужжатсиз ва эгасиз 5000 кути «Империял» сигаретаси олиб кираётганлиги аниқланди.

Шу йилнинг 20 август куни Тошкент аэропортининг махсус назорат залида йўловчилар божхона назорат кўригидан ўтказилганда Хитой Халқ Республикаси фуқароси Фан Бин Ганнинг юклари орасидан жами 40120 АҚШ доллари, 21 август куни эса аэропортининг II-пост ходимлари томонидан Қозғистон Республикаси фуқароси Гулнора Барлибаевадан божхона баённомасида кўрсатилмаган 8200 АҚШ доллари топилди. Ҳар иккала иш бўйича Ўзбекистон Республикаси Жиноят Кодексининг 182-моддаси 1-қисми «А» банди билан жиноий иш қўзғатилди.

1997 йил 13 август куни Тошкент вилояти 8-сонли «Бўстон» божхона пости ходимлари томонидан ГАЗ-53 «А» русумли, давлат белгиси 56-39 ТНН рақамли Бауржон Алимхонов бошқарувидаги автоулов Ўзбекистондан Қозғистонга кетаётган чоғида қўриқдан ўтказилиш учун тўхтатилди. Автоулов юкхонасида ўртача нархи 600 минг сўмни ташкил қилувчи чет элда ишлаб чиқарилган ҳар хил хўжалик буюмлари ҳамда Ўзбекистонда ишлаб чиқарилган 4400 кг. маргарин ҳеч қандай ҳужжатсиз, ноқонуний равишда олиб кетилаётганлиги, шунингдек, хайдовчиға тегишли бўлган 20089 тенге борлиги аниқланди.

Товар моддий бойликлар божхона омонига топширилди, пуллар эса ашёвий далил тариқасида олиб қўйилди. Б. Алимбеков устидан эса Ўзбекистон Республикаси Жиноят Кодексининг 182-моддаси 1-қисми «А» банди билан жиноий иш қўзғатилди. Қонунбузарлар қилмишларига яраша жавобгарликка тортилдилар.

Мирқарим МИРСОВUROV, Ўзбекистон Республикаси Давлат божхона кўмитаси бўлими бошлиғи, 2-даражали божхона маслаҳатчиси.

ЎЗБЕКИСТОН ПРЕЗИДЕНТИ КУБОГИ УЧУН

ТЕННИС «ЮЛДУЗ»ЛАРИ ЯНА ТОШКЕНТДА



Халқимиз орасида ҳар доим «Туй-туйга улансин!» деган яхши ниятли ибора юради. Кечагина мустақиллик кунини ўзгача шуқуқ ила қарши олган юртдошларимиз, бугун яна бир шодиёна — халқаро спорт байрами устидан чиқди.

Шу кунларда «Юнусобод» теннис мажмуаси ҳар қачонгидан чиройли ва фарахбахш тусга кирган. 30 дан зиёд давлат байроқлари қилпираб турган ушбу майдонда ҳеч нарса эътиборингиздан четда қолмайди. Айниқса, қувончлари оламни оладиган спорт кийимиди болакайлар, «Президент кубоги» турнири рамзи акс эттирилган оппоқ шапкали йигит-қизларнинг шўх-шодон хайқириқлари, турли тилда гаплашувчи спортчилар орасида юриб қайфиятингиз янада кўтарилади.

Шанба кuni тушдан кейин юртимиз теннисеварлари майдон узра оқиб кела бошлади. Шу кuni жаҳоннинг турли бурчагидан келган теннисчилар орасида саралаш босқич мусобақаси бошланди. Бу ўйинда юртдошларимиздан Вадим Куценко, Улугбек Музаев, Дмитрий Томашевич, Антон Какурин, Темура Фаниев ва бошқалар иштирок этдилар. Айниқса, Дмитрий Томашевич ўйин давомида ўзининг чаққонлиги, эпчиллигини кўрсата олди. У россиялик Андрей Павлов билан бўлган баҳснинг 1-сетида 4/6 га ютқазган бўлса ҳам 2-сетда 6/1 ҳисобида, 3-сетда 6/2 ҳисобида мағлубиятга учратиб, кейинги босқич баҳсларида қатнашиш ҳуқуқига муяссар бўлди.

Шунингдек, мусобақада ёш теннисчиларимиздан Темура Фаниев ва Антон Какуринлар ҳам тиришқоқлик билан ўйнадилар. Бу баҳсда Т. Фаниев ҳам ғалабани қўлга киритиб, кейинги мусобақага йўлланма олди. Демак, сараланган саккизта теннисчилар рўйхатида ҳамюртимиз Дмитрий Томашевич, Темура Фаниевлар билан бирга Равив Велденфелд, Ноам Бехр, Карстен Браач, Нир Велгрин (Исроил), Андрей Столяров (Россия) ва

Бжорн Пхау (Германия) исмишарфлари қайд этилди. Яқшанба кuni мажмуанинг биронга майдончаси бўш бўлмади. Эрталабдан барча теннисчилар қизгин таёргарлик билан машғул бўлди. Ва, ниҳоят орзиқиб қутулган вақт ҳам келди. Саккизлик бўйича баҳс ўйини бошланди. Мусобақада Велденфелд — Бехр, Браач — Велгрин, Столяров — Пхау ва Тома-


шевич — Фаниев билан ўйинга тушди. Бу сафар мухлислар ўтган галгидан кўп бўлса бўлдию, кам бўлмади.

Кўпчилик қатори мени ҳам юртдошларимиз Томашевич билан Фаниевлар ўртасидаги ўйин қизиқтирди. Айниқса, Томашевич ҳам ўнг, ҳам чап қўлида тўпни айлантириб ташлаши ва рақибнинг қабул қилиши жуда қийин бўлган вазиятларни содир этиши билан мухлислар эътиборини ўзига жалб этди. Фаниев эса тўпни аниқ майдонга туширишда озгина тажрибасизлик қилди. Лекин, ўйиннинг охиригача у ўз интилувчанлигини намоён этиб, рақибга «чиройли жавоблар» қайтара олди. У 1-сетда Томашевичга — 1/6 ҳисобида ютқазиб, 2-сетда тиришқоқлик билан ўйинда бурилиш ясади ва 6/4 га ютиб, ҳисобни 1-1 га етказди. 3-сет ўйини айниқса, қизиқарли бўлди. Томашевич кучли зарбалар билан рақибнинг майдонига бирин-кетин тўплар тушириб, очко жамлади. Фаниев бундай тезликка эга бўлган зарбаларни қайтаришга улгуролмай мағлубиятга учради ва 6/2 ҳисобида ютқазди.

Шундай қилиб ҳамюртимиз Дмитрий Томашевич, Олег Огородов билан асосий босқич беллашувларида қатнашадиган бўлди.

Саралаш мусобақаси ниҳоят оқибатга етди. Лекин, теннисчиларни энг масъулиятли дамлар кутмоқда. Улар олдида, юрт шайини ҳимоя қилишдек шарафли бурч турибди.

Рўзибой АЗИМИЙ.



БУНАҚА ҲИСОБ ҲАЁЛИНГИЗГА КЕЛГАНМИДИ?

Футбол

БЕШ

ПЕШҚАДАМНИНГ ҲАММАСИ ЮТДИ

ЖАҲОН биринчилиги финалида қатнашиш ҳуқуқини берадиган йўлланмалар учун даъвогарлик қилаётган Осиё қитъасининг 10 жамоаси ўртасидаги иккинчи босқич беллашувлари бошланди.

ЎЗБЕКИСТОН футболчилари қатнашаётган «Б» гуруҳида мутахассис ва мухлислар Бирлашган Араб Амирликлари ва Қозғистон жамоаларининг имкониятларини юқори рақабат деб баҳолаган эди. Дастлабки икки учрашув футболда «фол очини» калтис иш эканлигини яна бир бор исботлади. Дам олиш кuni Ўзбекистон телевидениесининг футбол шарҳи кўрсатувининг якунида Курия — Қозғистон учрашувидан айрим лаҳзалар — аниқроғи тўп киритилиш дақи-

қаларини кўриб, 3:0 натижасидан ҳайратландик. Сўнгра Япония — Ўзбекистон жамоалари ўртасидаги учрашувнинг (шарҳловчининг таъйидлашича техник сабабларга кўра биринчи бўлим кўрсатилмади) иккинчи бўлими бошланиши билан натижа майдон эгалари фойдасига 4:0 эканлигидан воқиф бўлиб, ҳаяжондан совуқ тер босди. Бундай ҳисоб ҳеч кимнинг хаёлига ҳам келмаганди. Иккинчи бўлим тенг кураш остида ўтди. Ватандошларимиз 3 та (Олег Шацких 2 та ва Андрей Федоров ўн

бир метрдан битта), мезбонлар эса икки та тўп киритишди. Игорь Шквирин билан Равшан Бозоров қўлай имкониятдан фойдалана олишмади. Иккинчи бўлимни деярли тенг кураш остида ўтаётганини кўриб, биринчи бўлимда футболчиларимиз қандай қилиб 4 та тўп ютқазиб юборганликлари биз учун жумбоқ бўлиб қолди. Тўғри, ўзга майдон муаммоси ҳам бор. Аммо ҳар бир очко эмас, ҳар бир тўп ҳам пировардида тарози палласини босишни унутмаслик керак. Эртдан кейин — 12 сентябрда Ўзбекистон футболчилари Курия терма жамоаси билан иккинчи саралаш учрашувини ўтказишади. Шу кuni Бирлашган Араб Амирликлари — Қозғистон жамоалари ўртасида ҳам ўйин бўлади.

ОЛИЙ ТАБАҚА жамоалари ўртасида медалларга даъвогарлик қилаётган беш жамоа — МҲСК, «Нефтчи», «Дўстлик», «Навбаҳор» ва «Пахтакор» 23-турда ғалабага эришдилар ва ўз ҳисобларига яна 3 тадан очко қўшишди.

МҲСК билан «Нефтчи» ўз майдонида ўйнаб, ғалабага эришган бўлса, «Дўстлик», «Навбаҳор» ва «Пахтакор» сафарда устун келишди. МҲСК «Янгиер» жамоасини қабул қилиб 3:1 ҳисобида енгди. «Нефтчи» ўз майдонида «Афросиёб» дарвозасига 8 та жавобсиз тўп киритди.

Турнир жадвалида учинчи поғонани эгаллаб турган вилоятимиз вакиллари «Дўстлик» сафарда «Зарафшон» маҳмони бўлди. 22-дақиқада Павел Кайгародов, 34- ва 50-дақиқаларда Фарид Хабибуллинлар майдон эгалари дарвозасига тўп киритишди. 3:0 ҳисобида ғалабага эришган вилоятимиз футболчилари ҳамон учинчи ўринда боришмоқда. «Пахтакор» «Хоразм» жамоасини кескин курашда 3:2, «Навбаҳор» эса «Косонсой»ни 3:1 ҳисобида

мағлуб этди. Қолган учрашувларда қуйидаги натижалар қайда этилди: «Атласчи» — «Насоф» — 1:4, «Трактор» — «Чилонзор» — 2:2, «Бухоро» — «Андижон» — 1:1, «Сурхон» — «Сўғдиёна» — 1:1.

23 турдан сўнг кучли бешликда бораётган жамоалар тўплаган очколари қуйидагича: МҲСК — 64 та, «Нефтчи» — 59, «Дўстлик» — 52, «Навбаҳор» ва «Пахтакор» жамоалари ҳисобида 47 тадан очко бор. Ундан кейинги ўринларда бораётган тўрт жамоа — «Зарафшон», «Бухоро», «Сўғдиёна» ва «Насоф» жамоалари бир хил — 30 тадан очкога эга.

Бугун навбатдаги тур учрашувлари ўтказилади. «Дўстлик» сафарда «Сурхон» маҳмони бўлади.

ОСИЁ БИРИНЧИЛИГИ СОВРИНДОРЛАРИ

МАЛАЙЗИЯНИНГ Куала Лумпур шаҳрида бокс бўйича Осиё 19-биринчилиги бўлиб ўтди. Унда 20 мамлакат сафида 200 дан зиёд спортчи иштирок этди. Ўзбекистон терма жамоаси сафида қатнашган 12 боксчининг 10 нафари медалларга сазовор бўлди.

Тўлқин Турғунов — (57 килограмм), Мухаммадқодир Абдуллаев (60 килограмм), Сергей Михайлов (81 килограмм)лар олтин медал билан тақдирландилар. Алишер Раҳимов (51 килограмм), Наримон Отаев (67 килограмм), Икром Бердиев (71 килограмм)

ва Дилшод Ёрбеков (75 килограмм) қумуш медал соҳиби бўлишди. Вилоятимиз вакили Фарҳод Бақиров 63,5 килограмм вазнда, Темир Иброҳимов 91 килограммга, Лазиз Зокиров 91 килограммдан юқори вазнларда бронза медаллари билан тақдирландилар. Қолган икки боксчимиз Дилшод Йўлдошев 48 килограмм вазнда, Темура Пулатов 54 килограмм вазнда бешинчи ўринни эгаллашди.

Шундай қилиб, 3 та олтин, 4 та қумуш ва 3 та бронза медалларига сазовор бўлган Ўзбекистон боксчилари норасмий жамоа ҳисобида ҳам биринчи бўлишди. Боксчиларимиз олдида яна бир жиддий имтиҳон турипти. Уларга келаси ой Венгрияда ўтказилган жаҳон биринчилигида ҳам ана шундай омад тилаймиз!

Миробод туманидаги «АТЛАНТ» хусусий ишлаб чиқариш тижорат фирмаси

ТУГАТИЛАДИ.

Даъволар эълон чиққан кундан бошлаб бир ой давомида 133-33-75 рақамли телефон орқали қабул қилинади.

ТОШКЕНТ ҲАКИКАТИ
TOSHIKENT HAQIQATI

Муассис:
ТОШКЕНТ ВИЛОЯТИ
ҲОКИМЛИГИ

Бош муҳаррир
Фатҳиддин
МУҲИДДИНОВ

Матбуат майдони:
700000, Тошкент
шаҳри, Матбуотчилар
кўчаси, 32.

Телефонлар:
хатлар ва оммавий
ишлар бўлими: 33-40-48
Эълонлар:
33-99-15, 36-57-27.

• Эълон ва билдирувлардаги факт ҳамда далилларнинг тўғрилиги учун реклама ва эълон берувчилар масъулдир.